

Usluge Saveza

• PRAVNO SAVJETOVALIŠTE:

Selma Fišek, viši saradnik za pravna pitanja

fax: + 387 33 552 810

selma@sogfbih.ba

• FINANSIJSKO SAVJETOVALIŠTE:

Dženita Kovačević, viši saradnik za finansijska pitanja

fax: + 387 33 552 810

dzenita@sogfbih.ba

Sadržaj biltena:

Održana 21. sjednica Predsjedništva Saveza	1
Načelnik Općine N.Sarajevo N.Koldžo traži da naknade od koncesija idu samo općinama	2
Održana sjednica Komisije za izbor i imenovanja Skupštine Saveza	2
INTERVJU: Advan Akeljić, načelnik Općine Vitez	3
Općina Bosanska Grahovo traži specijalni ekonomski status	5
Usaglašen prijedlog općina Vareš i Olovo vezan za donošenje Zakona o šumama ZDK upućen Savezu općina i gradova FBiH	5
Uskoro izgradnja 40 vjetroelektrana na Vlašiću	6
Održan sastanak načelnika četiri gradske općine Grada Sarajeva	6
Bosanska Krupa implementira ekološke projekte	7
Počinju radovi na izgradnji vodovoda i kanalizacije u Čelincu	7
USAID, UNDP i GIZ promovirali biblioteku energetske efikasnosti	7
INTERVJU: Jasminka Begić, načelnica Općine Doboj Jug	8
Njemačka ambasadorica u BiH posjetila Općinu Stari Grad Sarajevo	10

Bilten Saveza općina i gradova Federacije Bosne i Hercegovine

ODRŽANA 21. SJEDNICA PREDSJEDNIŠTVA SAVEZA



Sa sjednice Predsjedništva - SARAJEVO, 10.01.2013.

U Sarajevu, 10.01.2013. godine održana je Dvadesetprva sjednica Predsjedništva Skupštine Saveza općina i gradova Federacije Bosne i Hercegovine.

Sjednici su prisustvovali sljedeći članovi Predsjedništva: **Husejin Smajlović** - načelnik Općine Zenica, **Hasan Ajkunić** - načelnik Općine Bugojno, **Zlatko Hujić** - načelnik Općine Bosanski Petrovac, **Advan Akeljić** - načelnik Općine Vitez, **Hajrudin Hadžidedić** - načelnik Općine Odžak, **Muhamed Ramović** - načelnik Općine Goražde, **Luka Čelan** - načelnik Općine Livno, **Smiljana Viteškić** - predsjedavajuća Općinskog vijeća

Općine Ilidža, **Hazim Halilović** - savjetnik načelnika Općine Kalesija. Pored članova Predsjedništva, sjednici su prisustvovali i: **Ivo Jerkić** - načelnik Općine Čitluk, **Meliha Beširević** - pomoćnik načelnika Općine Breza, **Vesna Travljanin** - direktor Saveza i uposlenici stručne službe Saveza.

Predsjedništvo je razmatralo tačke koje se tiču imenovanja predstavnika Saveza u više radnih grupa i tijela.

Tako je izvršena izmjena člana **Koordinacionog tijela za obuku zaposlenika u jedinicama lokalne samouprave u Federaciji Bosne i Hercegovine** i imenovan Dragomir Lučić, tajnik Općine Kiseljak, umjesto Džavida Aličića, načelnika Općine Doboj-Jug. Također, imenovani su **Ferdo Mijač** - Općina Kakanj, **Grujo Marlin** - Općina Usora i **Imer Karagić** - Općina Olovo za predstavnike Saveza u **Radnu grupu za izradu prijedloga pravnog i finansijskog okvira za implementaciju Strategije obuke za jedinice lokalne samouprave u Federaciji Bosne i Hercegovine**.

U **Dom lokalnih vlasti Kongresa lokalnih i regionalnih vlasti Vijeća Evrope** imenovani su: **Semir Efendić**, načelnik Općine Novi Grad Sarajevo, za člana, te **Jasminka Begić**, načelnica Općine Doboj Jug i **Smiljan Vidić**, načelnik Općine Čapljina, za zamjenike člana, dok su u **Radnu grupu za izradu izmjena i dopuna Zakona o principima lokalne samouprave** za predstavnike Saveza imenovani **Nusret Helić**, načelnik Općine Gračanica i **Dinka Omanović**, stručna saradnica u Kabinetu načelnice Općine Visoko.

Predsjedništvo je razmatralo i jednoglasno usvojilo Izvještaj o radu Predsjedništva Skupštine Saveza općina i gradova Federacije Bosne i Hercegovine za period oktobar 2011. – decembar 2012. godine, Izvještaj o radu komisija Skupštine Saveza općina i gradova Federacije Bosne i Hercegovine za period oktobar 2011. – decembar 2012. godine i Strategiju razvoja usluga Saveza općina i gradova Federacije Bosne i Hercegovine. Ova tri dokumenta će se također razmatrati na Skupštini Saveza koja će se održati u februaru/veljači u Fojnici.

Pored ovih dokumenata Predsjedništvo je razmatralo i usvojilo sva potrebna razrješenja i imenovanja u organe i tijela Saveza koja će u formi prijedloga biti upućena Skupštini Saveza na razmatranje i usvajanje.



Sa sjednice Predsjedništva - SARAJEVO, 10.01.2013.

Investicija od 5,3 mil. eura u fabriku auspuha u
Sanskom Mostu

10

NAJAVA održavanja izborne Skupštine Saveza

11

Forum Svjetskog saveza gradova protiv
siromaštva

11

NAJAVA obilježavanja Dana općina

12

NAČELNIK OPĆINE NOVO SARAJEVO, N. KOLDŽO TRAŽI DA NAKNADE OD KONCESIJA IDU SAMO OPĆINAMA

07. januar/siječanj – Nakon što je Skupština Kantona Sarajevo usvojila nacrt zakona o izmjenama Zakona o koncesijama Kantona Sarajevo po kojem se prihodi od koncesija trebaju dijeliti u omjeru 50% Kantonu, a 50% općinama, burno je reagovao načelnik Općine Novo Sarajevo Nedžad Koldžo.

-Nećemo dozvoliti da Kanton Sarajevo uzima ono što nam po zakonu pripada. Ako bude trebalo ponovo ćemo ići pred Ustavni sud Federacije i tražiti da naknade od koncesija pripadaju samo općinama-rekao je Koldžo.

Dodao je i da je razgovarao sa premijerom Vlade Kantona Sarajevo Suadom Zeljkovićem i najavio da će tokom javne rasprave uložiti veliki broj primjedbi i tražiti da Kanton potpuno bude izbačen iz ove raspodjele.

-Ovo je direktan udar na općinske budžete koji su ionako osiromašeni. I ostali načelnici općina sa kojima sam razgovarao su istog mišljenja, tako da ćemo sačekati javnu raspravu i vidjeti u kojoj formi će ići Prijedlog zakona o koncesijama - kazao je Koldžo.

Ranijim zakonom prihodi od koncesija raspoređivali su se u iznosu od 60% u budžet Kantona Sarajevo, a 40% u budžet općine na čijoj teritoriji se nalazi predmet koncesije, piše Oslobođenje. (eKapija)



KORISNI LINKOVI ZA PREDPRISTUPNE FONDOVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

ODRŽANA SJEDNICA KOMISIJE ZA IZBOR I IMENOVANJA SKUPŠTINE SAVEZA OPĆINA I GRADOVA FBiH

U Sarajevu, u prostorijama Saveza općina i gradova FBiH, 08. januara/siječnja održana je Druga sjednica Komisije za izbor i imenovanja



Skupštine Saveza općina i gradova Federacije Bosne i Hercegovine.

Na sjednici je razmatrana samo jedna tačka dnevnog reda, i to priprema Prijedloga liste kandidata za organe i tijela Skupštine Saveza općina i gradova Federacije Bosne i Hercegovine koja će biti razmatrana na 21. sjednici Predsjedništva Skupštine Saveza, koja će se održati 10.01.2013. godine.

Tako je za predsjedavajućeg Skupštine Saveza predložen Dževad Bećirević, načelnik Općine Centar Sarajevo, a za zamjenika predsjedavajućeg Skupštine Saveza Mato Zovko, načelnik Općina Žepče. Takođe je zaključeno da, ukoliko Mato Zovko ne prihvati kandidaturu, na ovu funkciju predloži Smiljan Vidić, načelnik Općine Čapljina.

U **Predsjedništvo Saveza** predloženi su sljedeći kandidati: Edin Smajić, načelnik Općine Vogošća, Amra Babić, načelnica Općine Visoko, Ljubo Grizelj, načelnik Općine Grude, Željko Josić, načelnik Općine Domaljevac-Šamac, Nermin Ogrišević, načelnik Općine Cazin, Muhamed Ramović, načelnik Općine Goražde, Rasim Omerović, načelnik Općine Kalesija, Asim Mekić, načelnik Općine Busovača i Emir Bubalo, načelnik Općine Konjic. Prijedlozi iz Hercegbosanske županije (Kantona 10) nisu pristigli do održavanja sjednice komisije, te će isti biti naknadno razmatrani na sjednici Predsjedništva Saveza.

Na poziciji predsjednika Predsjedništva predložen je Husejin Smajlović, načelnik Općine Zenica, a za zamjenika načelnik Općine Čitluk Ivo Jerkić.

Za **Nadzorni odbor** predložen je Hasan Muratović, načelnik Općine Živinice i Salem Dedić, načelnik Općine Jablanica i Nedžad Zukanović, načelnik Općine Ključ za predsjednika Nadzornog odbora.

Prilikom pripreme prijedloga liste kandidata za sve pozicije vodilo se računa o teritorijalnoj i nacionalnoj zastupljenosti, a u skladu sa Statutom Saveza općina i gradova FBiH.

Za pozicije članova komisija, nakon rasprave o pristiglim prijedlozima, jednoglasno je izvršen izbor kandidata za svih šest komisija.



INTERVJU: ADVAN AKELJIĆ, NAČELNIK OPĆINE VITEZ

Razgovarala: Ljiljana SKOKIĆ

SARAJEVO, 17. JANUARA (ONASA) - Načelnik Općine Vitez Advan Akeljić u intervjuu za Agenciju ONASA govori, između ostalog, o radu općine u proteklom periodu, ekonomskoj situaciji, nosiocima privrednog razvoja općine Vitez, strateškim pravcima rada, stepenu zaposlenosti...

ONASA: Kakvo ste stanje zatekli u Općini po preuzimanju funkcije načelnika? Kako biste ocijenili rad Općine u proteklom periodu?

AKELJIĆ: Zatečeno stanje u općini može se sagledavati sa više aspekata. Nakon primopredaje dužnosti, odnosno nakon što sam pročitao izvještaje službi sačinjenih za potrebe primopredaje dužnosti načelnika, mogao sam konstatovati da saznanja koja sam imao prije izbora o stanju u općini, a bio sam poprilično informisan kroz posao koji sam obavljao prije načelničke funkcije, nisu bila adekvatna realnom stanju, odnosno ispostavilo se da su mnoge stvari u općini poprilično zrele za široku analizu, sanaciju ili neki drugi vid aktivnosti. Obzirom da je Budžet općine najvažniji dokument na koji se sve druge stvari oslanjaju, moram konstatovati, a što je potvrđeno i rebalansom, da je Općina Vitez u deficitu, koji je u realnom iznosu od oko jednog miliona KM, što na izvršenje Budžeta iz 2012. godine oko 5,5 miliona KM i nije mali deficit.

Općina ima i veliki dio nenaplaćenih potraživanja od prodaje zemljišta za gradnju koju su kupovali privrednici, kao i za rentu, oko tri miliona KM. Međutim, naplata tih potraživanja ide izuzetno teško, vjerovatno zbog loše globalne ekonomske situacije, pa je općina primorana u nekim slučajevima sudskim putem intervenirati kako bi naplatila svoja potraživanja.

Istakao bih i situaciju koju sam zatekao kada su u pitanju ljudski resursi u organu uprave. Tačnije, zatekao sam nekoliko službenika koji su prije nekoliko godina ostvarili uslove za penzionisanje, a nisu otišli u penziju. U tom smislu sam već intervenisao i tim službenicima su izdata rješenja, a na upražnjena radna mjesta zavisno od potrebe raspisat ćemo konkurse i zaposliti mlade kadrove. Također, prema analiziranom stanju kada je u pitanju gradnja objekata, potrebno je urediti zatečene situacije i pristupiti provođenju i poštivanju zakonskih procedura u legalizaciji i budućem planiranju. Uočljivo je i slabo stanje sa pojedinim javnim preduzećima i javnim ustanovama.

Dakle, sagledavajući zatečeno stanje u općini kroz Budžet, može se primjetiti da će biti potrebno mnogo napora i mudrosti u planiranju, kako bi se nastavilo sa investiranjem, a uporedo se radilo na sanaciji nastalog deficita. Ostale aktivnosti kojima će se uticati na zatečeno stanje planirat će sa pomoćnicima i Općinskim vijećem u cilju promjena tamo gdje su potrebne.

ONASA: Kako ocjenjujete trenutnu ekonomsku situaciju na području općine Vitez?

AKELJIĆ: Ako posmatramo odnos privrednika prema organu uprave, tj. teškoće u izmirivanju obaveza, moglo bi se konstatovati da se globalni ekonomski trendovi lagano odražavaju na mogućnosti investiranja. Detaljniji pokazatelji o poslovanju bit će pripremljeni od službe za lokalni razvoj i poduzetništvo za 2012. godinu pa će se komparacijom sa ranijim godinama tada moći izvoditi jasniji zaključci o poslovnom ambijentu u Vitezu.

ONASA: Koji su privredni subjekti nosioci razvoja Općine?

AKELJIĆ: Pretpostavljam da mnogi u BiH znaju da se u Vitez ide uglavnom kupovati. S obzirom da je na području naše općine najviše zastupljena trgovina i ugostiteljstvo, ta djelatnost oprihoduje preko 70 procenata ukupno ostvarenog prihoda na općini Vitez. Među tim vrtom privrednika najznačajniji su: FIS d.o.o., Tioil d.o.o., Economic d.o.o., Buba commerce d.o.o., G-Tank d.o.o. i drugi. Istovremeno, među proizvođačima izdvajaju se kompanije: Ecos d.o.o., Kristal d.o.o., Maks d.o.o., Mistika d.o.o., AM-2000 d.o.o., Kim-tec d.o.o., Divan d.o.o., Bosna- Wood d.o.o., Komping d.o.o., Inox- al d.o.o. U oblasti građevinarstva vodeću ulogu imaju: Ukra d.o.o., Grand.MS d.o.o., Ganik d.o.o., Horizont d.o.o. Što se tiče oblasti prometa, skladištenja i veza istakao bih Fis-Šped d.o.o., Jary trade d.o.o., Klas d.o.o., i druge.

ONASA: Koje su prioritetne aktivnosti koje će Općina Vitez realizovati u narednom periodu?

AKELJIĆ: Trenutno se na području općine Vitez realizuju ili pripremaju za realizaciju tri važna infrastrukturna projekta, a koji su regionalnog karaktera. Riječ je o plinifikaciji područja Srednjobosanskog kantona (SBK), izgradnji Regionalnog vodovoda "Plava voda", te pripremi za izgradnju brze ceste Lašva- Turbe.



Advan Akeljić, načelnik Općine Vitez



Grb Općine Vitez

"U narednom periodu posebnu pažnju planiramo usmjeriti na povećanje prihoda općine Vitez i na prikupljanje sredstava za realizaciju infrastrukturnih projekata sa viših nivoa vlasti. Takođe, u 2012. godini ističe period trajanja Strategije razvoja općine Vitez, pa ćemo u narednom periodu raditi na analizi stepena realizacije Strategije razvoja općine, te na izradi nove strategije razvoja za period 2013-2018. godina."



Vitez

KORISNI LINKOVI ZA PREDPRISTUPNE FONDOVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.chib-eu.org
www.cbc.bih-mne.org
www.srb-bih.org
www.cbc-cro-bih.net
www.programmmed.eu
www.tasco.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu



Vitez panorama

U narednom periodu posebnu pažnju planiramo posvetiti i realizaciji važnih projekata sa općinskog nivoa kao što su: nastavak aktivnosti na rješavanju problema vodosnabdijevanja u općini Vitez, priprema za rekonstrukciju kanalizacione mreže, razmatranje mogućnosti za izgradnju sistema grijanja u urbanom području.

Takođe, planiramo iskoristiti i prirodne potencijale lokaliteta Kruščica, te urediti i zaštititi potok Lupnicu. Naravno, dinamika realizacije aktivnosti lokalnog nivoa zavisit će od budžetskih mogućnosti, a obzirom da iste nisu dobre, aplicirat ćemo sa projektnim prijedlozima ka višim nivoima vlasti.

ONASA: Koje grane privrede imaju najveće potencijale za ulaganje u Vitez i šta Općina čini kako bi privukla investitore?

AKELJIĆ: Komparativna prednost općine Vitez je saobraćajna komunikacija, odnosno uvezanost između srednje Bosne i Sarajeva, tako da je uz stvoreni brend poslovnog centra jako zanimljivo područje za ulaganje. Na lokalitetu poslovne zone "PC- 96 i PC - 92 - 2" jedan dio infrastrukture je već izgrađen, a potrebno je planirati i graditi infrastrukturu na poslovnoj zoni "Šljivčica" na regionalnom putu Vitez- Zenica. U planu je i izrada industrijske zone na "Šantića polju".

Pored već razvijene trgovačke djelatnosti, prostora i potrebe ima za raznim vidovima proizvodnje, a nastojat će se jačati kapaciteti turističkih ponuda. Općina kao organ uprave u svemu tome treba da bude servis svim građanima i ulagačima i da stvara što bolji i povoljniji ambijent za poslovanje. U tome pravcu općina je u 2013. godini planirala provesti projekat regulatorne reforme propisa, tzv. "giljotina propisa", u saradnji sa međunarodnom finansijskom korporacijom (IFC).

ONASA: Na koje oblasti su fokusirani strateški pravci općine i koji su preduslovi za njihovu realizaciju?

AKELJIĆ: U narednom periodu posebnu pažnju planiramo usmjeriti na povećanje prihoda općine Vitez i na prikupljanje sredstava za realizaciju infrastrukturnih projekata sa viših nivoa vlasti. Takođe, u 2012. godini ističe period trajanja Strategije razvoja općine Vitez, pa ćemo u narednom periodu raditi na analizi stepena realizacije Strategije razvoja općine, te na izradi nove strategije razvoja za period 2013- 2018. godina.

ONASA: Da li ste zadovoljni stepenom zaposlenosti na području općine Vitez i šta će općinska vlast uraditi na poboljšanju stope zaposlenosti, posebno mladih i obrazovanih kadrova?

AKELJIĆ: Na osnovu podataka Službe za zapošljavanje SBK ukupan broj zaposlenih na području općine Vitez sa 30. novembrom 2012. godine je 5.680, dok je ukupan broj nezaposlenih osoba 3.953. Ovi podaci pokazuju da je ukupna stopa nezaposlenosti 41 posto.

Veliki problem predstavlja i nedostatak određenih obrazovnih profila, jer u općini Vitez nemamo školovanih zidara, tesara i tehničara, dok imamo sve više pravnika i ekonomista na biroima. Inače, prosječna plata u općini je 589,2 KM, dok je u SBK u novembru mjesecu ona iznosila 675,02 KM.

ONASA: Kakva je saradnja Općine sa Savezom općina i gradova Federacije BiH? U kojoj mjeri Savez pomaže Općini Vitez?

AKELJIĆ: Sama činjenica da je bivši načelnik Općine Vitez Vlado Alilović bio predsjednik Predsjedništva Saveza govori o izuzetno dobroj saradnji.

Nisam upoznat sa tim kakve je direktne koristi općina Vitez imala, ali znam da je saradnja postojala.

U narednom periodu neću bježati od dalje saradnje sa Savezom, jer smatram da je dobro da se svi načelnici, kao menadžeri općina, udružuju i razmjenjuju iskustva, te kroz zajedničko tijelo nastoje izdejsstvovati što više koristi za lokalnu zajednicu, jer na kraju tu se život i odvija.

ONASA: Prema Vašem mišljenju, koji su najčešći problemi sa kojima se suočava općina Vitez?

AKELJIĆ: Kao i u mnogim drugim općinama problem predstavljaju nažalost i loše navike pojedinih građana ili grupa građana koje se ogledaju u slabom plaćanju komunalnih naknada, nebrizi o smeću, pa se stvaraju divlje deponije..., odnosno riječ je o globalno slaboj percepciji prava, obaveza i mogućnosti kako stanovništva tako i nosilaca određenih funkcija i rukovodilaca.

Vitez se susreće sa nekoliko problema infrastrukture koji se manifestuju više puta u godini i u posljednjih nekoliko godina. Radi se o problemima vodosnabdijevanja u gradskom i ruralnim područjima, te sa kanizacionim sistemom. To su problemi koje se već odavno trebaju sanirati, ali postoji dugogodišnji problem sa nedostatkom sredstava. Procijenjeno je da bi za njihovu realizaciju trebalo oko 20 miliona KM.

Ipak se nadam, da ću zajedno sa vijećem i svojim saradnicima uspjeti, ulažući maksimum energije, odgovoriti na mnoge izazove koji tište moje sugrađane i mene sa njima.

OPĆINA BOSANSKO GRAHOVO TRAŽI SPECIJALNI EKONOMSKI STATUS



Bosansko Grahovo panorama

BOSANSKO GRAHOVO, 9. januar/siječanj – Općina Bosansko Grahovo je, još krajem prošle godine, uputila zahtjev Vladi Federacije BiH u kojem je zatražila specijalni ekonomski status, jer se nalazi u izuzetno teškoj materijalnoj situaciji i nema sredstava za ulaganje u razvojne projekte, ali i projekte obnove stambenih objekata i infrastrukturne mreže.

U ovoj povratničkoj općini ne funkcioniše ni jedan privredni pogon, a na sanaciju čeka oko 1.500 stambenih jedinica, kao i 110 kilometara lokalnih puteva, dok u više od 30 posto naselja još nije obnovljena elektro mreža.

Dodatni problem predstavlja i činjenica da ni 17 godina od završetka rata nije obnovljen rad Doma zdravlja, a nema ni autobuske linije prema kantonalnom sjedištu Livnu, pa je lokalno stanovništvo prinuđeno da se na razne načine snalazi za prevoz.



NAČELNIK OPĆINE VAREŠ A. KOVAČEVIĆ ZA ONASU: USAGLAŠENI PRIJEDLOG OPĆINA VAREŠ I OLOVO VEZAN ZA DONOŠENJE ZAKONA O ŠUMAMA ZDK UPUĆEN SAVEZU OPĆINA I GRADOVA FEDERACIJE BOSNE I HERCEGOVINE

SARAJEVO, 9. JANUARA (ONASA) - Usaglašeni prijedlog općina Vareš i Olovo vezano za donošenje zakona o šumama Zeničko- dobojskog kantona (ZDK) upućen je Savezu općina i gradova Federacije BiH (SOGFBiH) i očekujemo da se Savez snažno uključi u ovaj proces, izjavio je za Agenciju ONASA načelnik Općine Vareš Avdija Kovačević.

Prema njegovim riječima, donošenje zakona u šumama ZDK koji je u toku, od vitalnog i strateškog je interesa za općine Vareš i Olovo.

Kovačević je kazao da nije zadovoljan zakonskim rješenjem koje je ranije predložio zakonodavac.

"Smatramo da donošenje ovakvog predloženog zakona i njegovih odredbi predstavlja derogiranje ustavno- pravnog poretka ZDK i FBiH. Ustavni sud FBiH je bivši zakon o šumama stavio van snage i naredio zakonodavcu da ga u roku od šest mjeseci promijeni, a vodeći pri tome računa da se u zakon inkorporiraju odredbe Evropske povelje o lokalnoj samoupravi i principi zakona o lokalnoj samoupravi. Međutim, ovo što je nama zakonodavac ponudio gore je rješenje od onoga što je bilo ranije, odnosno ponuđeni Zakon je lošiji i anahroniji po lokalnu zajednicu od onoga koji je Ustavni sud FBiH proglasio neustavnim. Nas predloženi zakon naprosto gura u propast iz koje se nećemo moći izvući", istakao je Kovačević.

Pojasnio je da je na primjer, Poslovna jedinica Šumarstva Vareš, koja radi u sklopu ŠPD ZDK u 2012. godini ostvarila prihod od 7,6 miliona KM, rashod od 5,2 miliona KM, odnosno ostvarena neto dobit je bila 2,4 miliona KM samo na jednoj poslovnoj jedinici.

"Po osnovu tog zakona mi smo trebali da dobijemo pet posto od ukupno ostvarenih prihoda, što iznosi oko 400.000 KM, a mi smo dobili samo 100.000 KM. Za to nema racionalnog i zakonskog objašnjenja. Odgovorno tvrdim, da se nedostajuća sredstva prelivaju na druge općine gdje se ostvaruju veliki gubici poput općina Zavidovići, Zenica i Žepče", istakao je Kovačević.

Načelnik Općine Vareš je mišljenja kako je potrebno u izmjenama i dopunama Zakona omogućiti na području ZDK formiranje više preduzeća.

"Jedno preduzeće bi trebalo biti sastavljeno od ŠPD Vareš i Olovo i kao jedinstveno predstavljalo bi razvojnu šansu za ove općine, koje spadaju u kategoriju najugroženijih općina u FBiH. Istovremeno, potrebno je formirati i drugo preduzeće u sklopu Zavidovića", kazao je on i dodao da bi ovakvo rješenje omogućilo pružanje razvojne šansa kako bi se izašlo iz teške socijalno- ekonomske situacije.

"Minimum ispod koga mi ne možemo ići jeste poštivanje Evropske povelje o lokalnoj samoupravi, što podrazumijeva adekvatno i kvalitetno konzumiranje benefita od javnog dobra koje se zove 'vareška šuma', zatim poštivanje Zakona o principima lokalne samouprave, zakonom utvrđena mogućnost da se na nivou ZDK formira više preduzeća, gdje mi zajedno sa Olovom vidimo svoju realnu šansu, te uplaćivanje obaveznih pet posto od drvnih sortimenata u budžet općine isti dan kada se naplati svaka faktura. Također, tražimo i učešće u kreiranju kadrovske politike preduzeća na način koliko obaveza toliko i prava. Naime, općina Vareš je lider po količini etata koji unosi u ŠPD ZDK sa 40 posto učešća. Shodno tome, mi tražimo i 40 posto prava u kadrovskoj i politici zapošljavanja. Ništa ni više ni manje od toga", pojasnio je Kovačević.



"...ovo što je nama zakonodavac ponudio gore je rješenje od onoga što je bilo ranije, odnosno ponuđeni Zakon je lošiji i anahroniji po lokalnu zajednicu od onoga koji je Ustavni sud FBiH proglasio neustavnim."

"Preduzeće TLG iz Travnika će izgraditi 20 vjetroelektrana, dok će po 10 graditi JP Elektroprivreda BiH (EPBiH) i firma "Eberkon" iz Travnika ..."

KORISNI LINKOVI ZA PREDPRISTUPNE FONDOVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmemed.eu
www.tasco.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

...razgovarali su o temama kao što su finansiranje općina, Zakon o koncesijama, provedba Zakona o dobrobiti životinja (problem pasa lutilica), dimnjačarska djelatnost, kategorizacija cesta, regulacioni planovi.



Sa zajedničkog sastanka
načelnika četiri gradske općine

USKORO IZGRADNJA 40 VJETROELEKTRANA NA VLAŠIĆU

Na planini Vlašić u narednom periodu predviđena je izgradnja 40 vjetroelektrana, a Vlada Srednjobosanskog kantona (SBK) sa budućim investitorima ima potpisana tri koncesiona ugovora.

Preduzeće TLG iz Travnika će izgraditi 20 vjetroelektrana, dok će po 10 graditi JP Elektroprivreda BiH (EPBiH) i firma "Eberkon" iz Travnika, ukupne instalirane snage od 200 megavata.

Projekti su vrijedni oko 250 miliona eura i nalaze se u pripremljenoj fazi.

Partneri u njihovoj realizaciji bit će neke od kompanija iz inostranstva, poput "Siemensa" iz Hrvatske i "Hyundaija" za Evropu, ali će na značajnom dijelu poslova biti angažovane i firme iz BiH, a, kako se radi o dugoročnim projektima, to će pružiti i mogućnost otvaranja novih radnih mjesta.



ODRŽAN SASTANAK NAČELNIKA ČETIRI GRADSKJE OPĆINE GRADA SARAJEVA

Zajednički sastanak načelnika četiri gradske općine grada Sarajeva održan je 11. januara u Općini Stari Grad Sarajevo, a razmatrala su se neka od pitanja od ključnih za funkcionisanje općine kao organa lokalne samouprave, kao i za život i dobrobit njenih građana.

Kako je saopšteno iz Općine Stari Grad Sarajevo, načelnik ove općine Ibrahim Hadžibajrić, načelnik Općine Centar Dževad Bećirević, Nedžad Koldžo, načelnik Općine Novo Sarajevo i načelnik Općine Novi Grad Semir Efendić, razgovarali su o temama kao što su finansiranje općina, Zakon o koncesijama, provedba Zakona o dobrobiti životinja (problem pasa lutilica), dimnjačarska djelatnost, kategorizacija cesta, regulacioni planovi.

Tokom razgovora, načelnici četiri gradske općine usaglasili su zajedničke zaključke i stavove koje će ubuduće zauzimati po ovim pitanjima.

Po pitanju finansiranja općina načelnici su stali da se ubrza postupak za donošenje Zakona o raspodjeli javnih prihoda, čime bi se provela presuda Ustavnog suda FBiH, te da se u tom smislu pokrenu aktivnosti kod nadležnih organa Kantona Sarajevo (KS).

Također, zaključeno je da se zadnja tranša sredstava namijenjenih općinama iz budžeta Kantona Sarajevo ne smije dovoditi u pitanje, te da se ta sredstva što hitnije prebace na račune općina.

Općine će aktivno učestvovati u Javnoj raspravi o Nacrtu Zakona o izmjenama Zakona o koncesijama KS i u tome će zauzeti zajednički stav. Naredne sedmice u Općini Stari Grad će biti održan radni sastanak o ovoj temi, gdje će predstavnici Općina usaglasiti zajednički stav i blagovremeno ga dostaviti Vladi KS.

Općine će insistirati na većim nadležnostima u skladu sa propisima o principima lokalne samouprave.

Kako bi se na adekvatan način riješio problem pasa lutilica na gradskim ulicama, Općine će tražiti da se aktivira postupak za izmjenu i dopunu Zakona o dobrobiti životinja, ranije podnesen od strane Ureda za veterinarstvo.

Prema Vladi KS biće upućen zahtjev da se u Zakon o komunalnim djelatnostima uvrsti i dimnjačarska djelatnost, kako bi se ova djelatnost tretirala na jedinstven način na nivoima svih općina u KS.


Načelnici gradskih općina će podržati novu kategorizaciju cesta ukoliko uzajamno bude praćena pravima i obavezama, odnosno da se i prihodi koji prate novu kategorizaciju doznače općinama kako bi se obezbijedilo kvalitetno održavanje.

Kako se navodi, načelnici Hadžibajrić, Bećirević, Koldžo i Efendić dogovorili su se da zauzmu zajednički stav da se pokrene postupak izmjene i dopune Zakona o prostornom uređenju KS, odnosno da nadležnost donošenja svih planova bude na Općinskim vijećima, kako bi se sve općine u KS izjednačile sa pravima i obavezama za donošenje i provođenje regulacionih planova i da u punom kapacitetu mogu upravljati prostorom.

Donošenjem ovakvih rješenja omogućit će se normalan razvoj općina koji je sadašnjim zakonskim rješenjima znatno otežan, zaključili su učesnici sastanka.

Načelnici su se dogovorili da se ovakvi sastanci održavaju na mjesečnom nivou, a naredni bi trebao biti održan u Općini Centar sljedećeg mjeseca, navodi se u saopštenju.

Savez / Zajedno za uređenu i razvijenu lokalnu samoupravu



BOSANSKA KRUPA IMPLEMENTIRA EKOLOŠKE PROJEKTE



SARAJEVO, 18. januar/siječanj – Potpisivanjem ugovora o izradi studijsko-projektne dokumentacije za sistem prikupljanja, odvodnju i prečišćavanje otpadnih voda u općini Bosanska Krupa, između načelnika Armina Halitovića i direktora Sektora "Energoinženjering", Energoinvest d.d. Sarajevo Seada Gušmirovića, ozvaničen je početak jednog od najvećih projekata u općini Bosanska Krupa. Posao za izradu projekta prikupljanja, odvodnju i prečišćavanje otpadnih voda, Općina je povjerila firmi Energoinvest d.d. iz Sarajeva, čiji su predstavnici danas boravili u Bosanskoj Krupi.

Direktor Sektora "Energoinženjering" Sead Gušmirović, kazao je prilikom potpisivanja da je ovo ekološki napredak za bilo koju sredinu, a naročito za općinu koja posjeduje ogromna prirodna bogatstva.

Sredstva u iznosu od 293.319 KM za izradu studijsko-projektne dokumentacije za sistem prikupljanja, odvodnju i prečišćavanje otpadnih voda, Općina Bosanska Krupa je osigurala kod Evropske investicijske banke, a rok za izradu projekta je 12 mjeseci. Predviđeno je da će prvi radovi početi već u ovoj godini.

"Na 'Energoinvestu' je zahtijevan posao, ali mi ne sumnjamo da će sve biti besprijeckorno. Vrlo značajno je i to što je novac obezbijeđen, spreman na račun. O značaju cijelog projekta ne treba mnogo ni govoriti. Sasvim je jasno da je to Krupljanima od iznimne važnosti, prije svega zbog zdravlja, zaštite izvorišta i očuvanja prirodne sredine", kazao je načelnik Armin Halitović.



ENERGOINVEST

POČINJU RADOVI NA IZGRADNJI VODOVODA I KANALIZACIJE U ČELIĆU



U općini Čelić, sutra (21.01.2013), će zvanično početi radovi na izgradnji vodovoda i kanalizacije.

"Na ovaj projekat vrijedan 3.111.000 eura čekalo se četiri godine", izjavio je načelnik Općine Čelić Sead Muminović.

Prema njegovim riječima završeni su svi formalno - pravni poslovi oko izgradnje vodovoda i kanalizacije u općini Čelić. "Sutra i prekosutra dolaze izvođači radova iz Austrije. Sastat će se sa predstavnicima kantonalnih ministarstava poljoprivrede, vodoprivrede i šumarstva i za

prostorno uređenje i okoliš, te Općine Čelić", kazao je Muminović.

Izgradnja vodovoda i kanalizacije je od velike važnosti za mještane Čelića i okolnih sela, kao i privrednike ovog kraja. Da bi radovi bili završeni na vrijeme Općina Čelić, očekuje oko milion KM od IFAD projekta, u kojem učestvuju 27 općina iz Federacije BiH.



Grb Općine Čelić

USAID, UNDP I GIZ PROMOVIRALI BIBLIOTEKU ENERGETSKE EFIKASNOSTI

MOSTAR, 23. januar/siječanj – Američka agencija za međunarodni razvoj (USAID), Razvojni program Ujedinjenih nacija (UNDP) i Njemačka razvojna agencija (GIZ), predstavili su danas u Mostaru zajednički izdavački projekat Biblioteke energetske efikasnosti (EE Biblioteka) u BiH.

Promocija se odvijala u Američkom kutku Mostar, smještenom u zgradi Gimnazije Mostar, koji je ovom prilikom dobio 10 setova knjiga EE Biblioteke, saopćeno je iz USAID- ovog projekta 3E.

EE Biblioteka se sastoji od sedam edukativnih publikacija, izdatih od strane USAID-a, UNDP-a i GIZ-a.

Ove knjige sadrže informacije o energetskej efikasnosti koja je povezana sa sistematskim upravljanjem energijom u gradovima, zatim provođenju energetskih pregleda objekata i monitoringom i mjerenjem utroška energije, potom stvarnim načinima finansiranja projekta implementacije mjera energetske efikasnosti kao i uređenja ureda u skladu sa preporukama "zelenog ureda".

Knjige koje potpisuju autori sa područja jugoistočne Europe, stručnjaci na raznim poljima energetske efikasnosti, predstavljaju korisne reference i izvor informacija za sve zainteresovane kao i one koji se profesionalno bave energetskom efikasnošću.

Knjige su predstavili Sergej Batovanja ispred UNDP-a, Brian Schjertzer iz GIZ-a te Mak Kamenica iz USAID-ovog projekta Ekonomija energetske efikasnosti (3E) koji je ovom prilikom istakao da publikacije mogu pomoći građanima da ostvare uštede na energentima, a kompanijama pruže informacije o provođenju mjera energetske efikasnosti.



USAID
FROM THE AMERICAN PEOPLE



giz



Grb Općine Doboj Jug

**KORISNI LINKOVI ZA PREDPRISTUPNE
FONDOVE EU:**

www.southeast-europe.net
www.adriaticpacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmed.eu
www.tacso.org
www.euroinfocenter.ba
www.balkanfund.org
www.eurelmed.com
www.eacea.ec.europa.eu



Sjedište Općine Doboj Jug

INTERVJU: JASMINKA BEGIĆ, NAČELNICA OPĆINE DOBOJ JUG

Razgovarao: Adis BRDARIĆ

SARAJEVO, 20. JANUARA (ONASA) - Načelnica Općine Doboj Jug Jasminka Begić, u intervjuu za Agenciju ONASA govori, između ostalog, o radu Općine u prošloj godini, najznačajnijim realizovanim i započetim projektima, Strategiji razvoja Općine, potencijalima, zaposlenim, saradnji sa drugim nivoima vlasti...

Jasminka Begić, načelnica
Općine Doboj Jug

ONASA: Po čemu je Općina Doboj Jug prepoznatljiva u odnosu na ostale općine u BiH?

J. BEGIĆ: O Općini Doboj Jug priča traje tek 15 godina, jer ona toliko i postoji. Radi se dakle o postdejtonskoj općini čija je teritorija prije rata bila u sastavu Opštine Doboj koja je ostala u sastavu Republike Srpske (RS), a ova općina u sastavu Zeničko-dobojskog kantona (ZDK) i Federacije BiH (FBiH). Od 1998. godine dobili smo lokalnu samoupravu. Današnji prostor od 10.2 km² je iz rata izašao gotovo potpuno porušen. Danas se te posljedice skoro ne mogu ni prepoznati. Činjenica je da smo mala, ali stabilna i prosperitetna lokalna sredina koja je dobar primjer da i male sredine mogu imati kvalitetnu lokalnu zajednicu. Poznati smo prije svega po jako značajnom geostrateškom položaju. Ovdje se ukrštaju dva bosanskohercegovačka najfrekventnija magistralna puta M-4 Tuzla - Banjaluka i M-17 Doboj - Sarajevo, tu je i ušće rijeke Usore u rijeku Bosnu, zatim blizina željeznice, blizina gradova ovog dijela BiH (Doboj, Teslić, Tešanj, Maglaj, Tuzla, Zenica). Osim toga, na našem prostoru će biti uzlazno - silazna petlja koridora 5c za ovu regiju što će predodrediti dalju sudbinu u razvoju, ne samo općine, nego i regije. Dakle, ovdje se radi o velikoj frekvenciji ljudi i dobara i to je naša najveća prednost, ali i izazov i šansa za bolju budućnost. Zato nije čudo što je prostor općine jako primamljiv za ulaganje, jer ljudi to prepoznaju.

ONASA: Kako biste ocijenili rad Općine Doboj Jug u prošloj godini, odnosno koji su to najznačajniji započeti i realizovani projekti u tom periodu?


J. BEGIĆ: Općina Doboj Jug ima Strategiju razvoja za period od 2011. do 2020. godine koja je donesena uz podršku UNDP-a u skladu sa projektom ILDP (Integrirani lokalni razvoj) što je vrlo dobra stvar za ovu lokalnu zajednicu. To je dobra osnova za planski pristup razvoja Doboj Juga, pogotovo ako se uzme u obzir činjenica da je već ranije usvojen Prostorni plan kao dokument višeg reda iz prostorno-planske regulative. Ono što želim kazati jeste nastavak izgradnje industrijsko-poslovne zone Matuzići - Karuše u prošloj godini, što će se nastaviti svakako i u ovoj. Bolje rečeno, želimo stvoriti povoljni ambijent za privlačenje domaćih i stranih investitora. U vezi sa ugovorom sa kupcima zemljišta u industrijskoj zoni, zaštita općinskih interesa mora biti isključivo kroz broj radnih mjesta koja će investitori ponuditi tržištu rada i otvarati nova radna mjesta. Osim ovoga, nas opterećuje nedostatak sredstava za nastavak izgradnje kanalizacije. To je obimna investicija i bez podrške viših nivoa vlasti sa našim skromnim budžetom ne bismo mogli ovo pitanje uskoro okončati, mada smo dobar dio posla uradili.

ONASA: Koji su Vam prioritetni projekti u 2013. godini i za koje ste projekte planirali najviše sredstava?

J. BEGIĆ: Svakako prioritet nam je nastavak izgradnje kanalizacije i Industrijske zone. Paralelno sa ovim moramo uraditi rekonstrukciju glavne ulice kroz Matuziće, ali i ona je uslovno vezana za postavljanje kanizacionog kolektora ispod ulice, tako da se ovo mora raditi paralelno. Najviše sredstava smo upravo planirali za ove namjene.

ONASA: Na čemu je bazirana Strategija razvoja Općine?

J. BEGIĆ: Strategija razvoja do 2020. godine je urađena zajedno sa građanima, nevladinim organizacijama i fokus grupama. Dokument je sveobuhvatan, pogotovo socijalno - ekonomska analiza stanja. Nakon javnih rasprava i brojnih radionica, identifikovano je nekoliko područja na kojima će se u izgradnji kapaciteta davati fokus kao što su upravljanje lokalnim razvojem, ljudskim resursima, javno - privatno partnerstvo, kandidiranje projekata prema Evropskoj uniji (EU), a općinski razvojni tim je sačinio sinteznu kartu sa blizu 200 projekata koji bi, kako je planirano, trebalo da budu realizovani do 2020. godine. Zajedno sa Općinom Tešanj i Usorom radićemo zajednički projekat izrade studije za zajednički kolektor otpadnih voda, u čemu nas prati Fond za zaštitu okoliša Federacije BiH i resorna ministarstva.



ONASA: U kojim oblastima su najznačajniji potencijali za ulaganja u Općinu Doboju Jug?

J. BEGIĆ: Najvredniji potencijal su naši ljudi i naš prostor koji je, činjenica mali, ali njegov položaj o kome sam govorila je jako atraktivan. Kako ne raspolažemo sa državnim zemljištem (skoro svo zemljište je privatno vlasništvo), prostorno-planskom dokumentacijom štitimo stihijsku gradnju. Naš razvoj se trenutno bazira većim dijelom na uslužnim djelatnostima, mada imamo nešto i proizvodnje u oblasti tekstila i proizvodnje svih vrsta auto-guma. Akcenat ćemo dati na razvoj sela, tačnije iskorištavanje resursa u brdskom dijelu općine, a tu nam je šezdeset posto teritorije.

ONASA: Koji privredni subjekti su nosioci razvoja Općine Doboju Jug?

J. BEGIĆ: U ovom trenutku od 240 privrednih subjekata, malih i srednjih preduzeća, zanatlija, ugostitelja, trgovaca i drugih uslužnih djelatnosti, izdvajam građevinsku firmu za izgradnju i održavanje puteva "Dobojuputeve", autoprevozno i transportno preduzeće "Bosnaekspres", proizvodnju tekstila "TrendTex", reparaciju guma "Sintex". Tu je naša vrlo respektabilna Poliklinika sa dnevnom bolnicom, kao i brojni marketi (Pilot-Company, proizvodnja i distribucija cvijeća "Kamelija", benzinske pumpe "Hifa", "Ganigo-petrol", autocentar Hundayi).

ONASA: Pokazuju li strani investitori interesovan je za Vašu općinu?

J. BEGIĆ: Da, mi već imamo jednog partnera iz Njemačke koji je kupio zemlju i objekat i radi na uvozu i distribuciji kvalitetne eko-kože za namještaj, a ovih dana i firma Bau-Haus je pokazala interesovanje za izgradnju svog objekta. Sa Turskom imamo dobre odnose, bratimili smo se sa najrazvijenijom općinom Sindžan glavnog grada Turske, jednom od osam općina u Ankari, pa očekujemo da se i oni pojave na našem prostoru.

ONASA: Kakvo je stanje u Općini u vezi zapošljavanja mladih kadrova?

J. BEGIĆ: Što se tiče Općine, mi iz budžeta redovno stipendiramo tridesetak studenata. Sa našim poslodavcima obavljamo redovno razgovore da upošljavaju mlade. U općinskoj administraciji je do sada bilo nekoliko pripravnika i volontera. Problem je što je naša privreda bazirana na malim i srednjim preduzećima i što se radi isključivo o privatnom sektoru, pa je u odnosu na druge sredine, teže zaposliti mlade-stručne kadrove. Ne treba zanemariti i to da se mnogi naši sugrađani zapošljavaju u okruženju, gdje prednjači susjedna općina Tešanj, čija privreda je u razvoju. Kroz naše razvojne planove, pogotovo kada prorade industrijske zone (Matuzići i Mravići), naš prioritet će biti isključivo radna mjesta i samim time upošljavanje mladih kadrova.

ONASA: Prema Vašem mišljenju, koji su najčešći problemi sa kojima se suočava Općina Doboju Jug?

J. BEGIĆ: Već sam istakla nedostatak sredstava za dovršetak započetih poslova u oblasti kanalizacije, rekonstrukcije puteva, rasvjete. Građani Doboju Juga jedva čekaju da na ovom prostoru počnu radovi na koridoru 5c, jer će na ovom području biti silazno-uzlazna petlja za južni dio Doboja i za ovaj dio ZDK. Paralelno s tim očekujemo uređenje korita rijeke Usore koja nam je velika prijetnja zbog izlivanja voda u kišnom periodu. Često nas plavi i time nanosi ogromne štete. Sami ne možemo rješavati ovaj problem, a o tome znaju svi nivoi vlasti u BiH. Sa susjedima moramo rješavati zajedničke probleme i raditi zajedničke projekte u oblasti vodosnabdjevanja, rješavanja krutog otpada, površinskih voda.

ONASA: Kakva je Vaša saradnja sa Savezom općina i gradova FBiH?

J. BEGIĆ: I moje prethodne kolege imale su dobru saradnju sa Savezom općina i gradova FBiH i ja planiram tu saradnju nastaviti i usavršavati. Kao načelnicu, Predsjedništvo Saveza me predložilo za predsjednicu Kongresa lokalnih zajednica Vijeća Evrope. Zahvaljujući ovom savezu, u toku je realizacija programa obuke državnih službenika i namještenika i to su dobre stvari za lokalne zajednice.

ONASA: Kakva je Vaša saradnja sa višim nivoima vlasti?

J. BEGIĆ: Ne mogu davati nekakvu generalnu ocjenu, jer sam na mandatu tek treći mjesec, ali prema prvim reakcijama, mislim da se stvari pozitivno kreću, kako sa kantonalnim, tako i sa federalnim, odnosno državnim nivoom vlasti. Imam stalnu komunikaciju sa ministarstvima. Općinu Doboju Jug su posjećivali, u ovom kratkom periodu otkada sam na dužnosti, mnogi dužnosnici, od načelnika i premijera Kantona, do ministra za boračka pitanja, predstavnika resornih ministarstava. Bilateralno razgovaramo o svemu, pogotovo kada je u pitanju njihova podrška za određena otvorena pitanja i rješenja za građane ove općine.

"Kao načelnicu, Predsjedništvo Saveza me predložilo za predsjednicu Kongresa lokalnih zajednica Vijeća Evrope. Zahvaljujući ovom savezu, u toku je realizacija programa obuke državnih službenika i namještenika i to su dobre stvari za lokalne zajednice."



Matuzići, Doboju Jug

NJEMAČKA AMBASADORICA U BIH ULRIKE MARIA KNOTZ POSJETILA OPĆINU STARI GRAD SARAJEVO



Načelnik Hadžibajrić sa njemačkom ambasadoricom u BiH

SARAJEVO, 14. januar/siječanj – Ambasadorica Savezne Republike Njemačke u BiH Ulrike Maria Knotz, posjetila je danas Općinu Stari Grad, a ambasadoricu je u svom kabinetu primio načelnik Ibrahim Hadžibajrić.

Povod posjete bile su čestitke Hadžibajriću na ponovnom reizboru za načelnika Općine i pobjedi na lokalnim izborima.

Između ostalog, razgovarali su o principima na kojima počiva lokalna samouprava na nivou cijele BiH, o nadležnostima viših nivoa vlasti i njihovim obavezama koje do sada nisu ispoštovali, te o problemima s kojim se susreće Općina Stari Grad.

Načelnik Hadžibajrić kazao je da dosta diplomata koji su na službi u BiH nisu upućeni u pomenute stvari, tako da on preko njih pokušava da djeluje i apeluje na više instance vlasti da u punom kapacitetu zaživi Zakon o lokalnoj samoupravi.

Najveći teret izvršne, a jednim dijelom i zakonodavne vlasti, upravo leži na općinama u BiH. Jednostavno, mora se osjetiti poboljšanje kada je u pitanju lokalna samouprava", kazao je Hadžibajrić.

Ambasadorica Knotz kazala je kako su tokom susreta govorili o problemima, potencijalu i perspektivama cijele općine.

"Mislim da Općina Stari Grad u BiH ima poseban položaj, jer turisti koji dođu u BiH prvo posjete Stari Grad. Njih interesuje kultura i znamenitosti koje ova općina posjeduje. Zbog toga mislim da ova općina zasluži jedan poseban tretman i značaj", kazala je ambasadorica.

Načelnik Hadžibajrić na kraju je dodao da su se složili oko svih pitanja koje se odnose na lokalnu samoupravu, te dodao kako je zajedno sa svojim timom ambasadorici predočio srednjoročni plan razvoja BiH do 2022. godine.

Osim načelnika Hadžibajrića i ambasadorice Knotz, današnjem sastanku prisustvovala su i savjetnica načelnika za privredu Azra Torlak i sekretar organa državne službe Diana Salihbegović, navodi se u saopćenju Općine.

KORISNI LINKOVI ZA PREDPRISTUPNE FONDove EU:

www.southeast-europe.net
www.adriaticpacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

Svjetski lider u proizvodnji sportskih sistema auspuha za motorna vozila "Remus Innovation" odlučio je da investira ukupno 5,3 mil EUR i zaposli 300 radnika u novoosnovanom pogonu u Sanskom Mostu.

INVESTICIJA OD 5,3 MILIONA EURA U FABRIKU AUSPUHA U SANSKOM MOSTU

Svjetski lider u proizvodnji sportskih sistema auspuha za motorna vozila "Remus Innovation" odlučio je da investira ukupno 5,3 mil EUR i zaposli 300 radnika u novoosnovanom pogonu u Sanskom Mostu. Ovo preduzeće izvozi 90% svoje proizvodnje u preko 60 zemalja svijeta, a kompletna proizvodnja u pogonu koji se nalazi u Sanskom Mostu biće namijenjena izvozu.

Vlasnici firme "Remus Innovation d.o.o." Sanski Most, bračni par Angelika i Oto Kreš, krajem decembra ugostili su Razvojnu agenciju Unsko-sanskog kantona i predstavili dosadašnja ulaganja i planove za nova ulaganja na području Unsko-sanskog kantona. Značajan dio sredstava je uložen u fizičku infrastrukturu. U tehnologiju je do sada uložen 1,5 mil EUR, te do sada ima skoro 50 zaposlenih. Sa novim ulaganjem koje ova firma planira započeti u 2013. godini, imaće 300 zaposlenih a investicija će ukupno iznositi 5,3 mil EUR.

Direktor Razvojne agencije USK Haris Komić izjavio je da je fasciniran pogonom i cijelim projektom, te da će upoznati premijera i ministra privrede USK sa tom investicijom, kako bi preuzeli aktivnu ulogu kada je u pitanju ova firma, kao i svi budući investitori u Unsko-sanskom kantonu.

Naglašene su i glavne komparativne prednosti investiranja u regiju sjeverozapadne BiH i USK koje mogu biti odlično iskorištene, kao što su blizina EU i jeftina radna snaga.



NAJAVA ODRŽAVANJA IZBORNE SKUPŠTINE SAVEZA OPĆINA I GRADOVA FBiH

Izborna Skupština Saveza općina i gradova Federacije Bosne i Hercegovine, prema Zaključku Predsjedništva Saveza od 04. decembra/prosinca 2012. godine **održat će se 06. i 07. februara/veljače 2013. godine u Fojnici, apartmansko naselje 'Aquareumal'.**

Na radnom dijelu Izborne Skupštine Saveza, koji će se održati 07. februara/veljače, birat će se slijedeći organi i tijela Saveza:

- Predsjedavajući i zamjenik predsjedavajućeg Skupštine Saveza
- Predsjedništvo Skupštine Saveza
- Nadzorni odbor
- Komisija za ekonomski razvoj općina i gradova i finansije
- Komisija za međunarodne veze, saradnju i evropske integracije
- Komisija za imovinska pitanja, prostorno uređenje, stambeno-komunalne djelatnosti i zaštitu životnog okoliša
- Komisija za ustavna i zakonodavna pitanja
- Komisija za razvoj i unapređenje lokalne samouprave
- Komisija za izbor i imenovanja

Predsjedavajući Skupštine Saveza, zamjenik predsjedavajućeg Skupštine Saveza, predsjednik Predsjedništva Skupštine Saveza, zamjenik predsjednika Predsjedništva Skupštine Saveza, te predsjednik i dva člana Nadzornog odbora se mogu predlagati i birati sa područja cijele teritorije Federacije BiH, dok se deset članova Predsjedništva Skupštine Saveza predlaže i bira po principu jedna općina/grad sa područja svakog kantona. Isti princip se primjenjuje i na izbor članova šest skupštinskih komisija koje broje po deset članova.

U okviru ovogodišnje Skupštine, pored radnog dijela, dan ranije 06. februara/veljače, planirana su izlaganja partnera, između ostalog i na sljedeće teme:

- Jačanje odnosa između jedinica lokalne samouprave i organizacija civilnog društva,
- Prezentacija projekta 'Podrška razvoju lokalne samouprave',
- Doprinos ustavnoj reformi u BiH,
- Gender u lokalnom razvoju,
- Emisija municipalnih obveznica, itd.

FORUM SVJETSKOG SAVEZA GRADOVA PROTIV SIROMAŠTVA



Svjetski savez gradova protiv siromaštva (WACAP) u saradnji sa irskim predsjedanjem Vijećem EU-a, organizira 8. Forum Svjetskog saveza gradova protiv siromaštva.

Forum će se održati u Dublinu (Dublin) 20. i 21. februara/veljače 2013. godine.

Na samom otvorenju Foruma, Maire Geoghegan-Quinn, evropska povjerenica za istraživanje, inovacije i nauku, će ispitati ulogu tehnologije u rješavanju izazova urbanog siromaštva u izradi gradova

pametnih, sigurnih i održivih. Tokom foruma ključne teme će biti razmatrane:



- Promjena načina razmišljanja za promijenu svijeta: prioriteti i potrebe s Michelle Bachelet, izvršni direktor UN Women, Tom Arnold, predsjednik Uprave, Koncerna Worldwide i Mary Robinson, Mary Robinson Fondacija - Klimatska pravda
- Gdje se tehnologija uklapa u borbi protiv siromaštva s Vinay Venkatraman, dizajner i suosnivač Instituta za interaktivni dizajn iz Kopenhaga
- Poslovni na gradskoj saradnji sa Sally Fegan-Wyles, izvršna direktorica UNITAR i Simon Gilesa, direktor, Strategija inteligentnih gradova, Accenture

Forumu će prisustvovati gradonačelnici, urbanisti, predstavnici civilnog društva i predstavnici proizvođača visokih tehnologija i inovacija iz više od 30 zemalja.

Rasprava će obuhvatiti:

- Poboljšanje vodoopskrbe i odvodnje s novom tehnologijom
- Kako tehnologija podržava urbana stambena rješenja
- E-zdravstvo i pristup zdravstvenoj zaštiti za sve
- Može li tehnologija stvoriti sigurniji grad?
- Ishrana urbaniziranog svijeta - ulogu tehnologije u sigurnosti hrane i prehrane
- Načini za postizanje ekološke budućnosti u gradu

Za više informacija posjetite sljedeću web stranicu: http://dublin2013.ie/images/pdf/WACAP_programme.pdf



Savez općina i gradova Federacije
Bosne i Hercegovine

Musala 5/1
71 000 Sarajevo

Phone: ++387 33 216 502, 209 024, 209 120

Fax: ++387 33 552 810, 552 811

E-mail: dino@sogfbih.ba

Nađite nas na facebook-u



POSJETITE NAS NA WEB-U

WWW.SOGFBIH.BA

Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način Vam, također pružamo informacije o održanim konferencijama, seminarima, radionicama, okruglim stolovima, javnim raspravama, o održanim sjednicama organa i tijela Saveza.

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba

Molimo vas da informacije o našem biltenu prosljedite svim u vašoj i susjednim općinama i drugim zainteresiranim.

Ukoliko želite da objavite neke od vaših novosti, iskoristite bilten Saveza, koji je brz i efikasan način komuniciranja.

Sa zadovoljstvom očekujemo vaše komentare, sugestije i primjedbe.

NAJAVA OBILJEŽAVANJA DANA OPĆINA ZA MJESEC FEBRUAR/VELJAČA

- **08. februar/veljača - Dan Općine Odžak.** Tog dana 1996. godine prvi povratnici predvođeni policijskim snagama vraćaju se u svoje domove.
- **20. februar/veljača - Dan Općine Bužim.** Na taj dan 1995. godine Predsjedništvo RBiH je Uredbom sa zakonskom snagom formiralo općinu Bužim.
- **21. februar/veljača - Dan Općine Ljubuški.** Tog dana 1444. godine napisan je testament bogatog dubrovačkog trgovca Gojслава Orlovića u kojem se spominje dar crkvi u Ljubuškom. Smatra se najstarijim pisanim dokumentom u kojem se spominje naziv Ljubuški (Lubusia), a čuva se u dubrovačkom arhivu.
- **22. februar/veljača - Dan Općine Jablanica** i dan sjećanja na oslobođenje grada u Drugom svjetskom ratu.
- **23. februar/veljača - Dan Općine Velika Kladuša.** Ovaj datum je značajan kao sjećanje na prvo oslobađanje Velike Kladuše u Drugom svjetskom ratu kada je uspela opstati kao slobodan teritorij punih 731 dan.
- **26. februar/veljača - Dan Općine Bihać.** Na taj dan 1260. zabilježen je prvi pisani historijski trag o gradu Bihaću u Povelji ugarsko-hrvatskog kralja Bele IV, kao gradu sagrađenom na Otoku sv. Ladislava, u vlasništvu benediktinske opatije iz Topuskog. Godine 1262. proglašen je slobodnim kraljevskim gradom sa svim pravima što mu je osiguralo samostalni razvoj.
- **29. februar/veljača - Dan Općine Ilijaš.** Na ovaj dan, 1996. godine, na oslobođenu teritoriju općine Ilijaš došlo je do masovnog povratka izbjeglog stanovništva i uspostavljanja civilne vlasti.




Velika Kladuša




Bihać



Ilijaš



Odžak



Bužim



Ljubuški



Jablanica

Savez / Zajedno za uređenu i razvijenu lokalnu samoupravu